



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Shaheen Afridi ILT20 franchise
Desert Vipers nung denogo

N Korea lenir Kim-i missiles,
shells timba yanglutsü tuyu

VOL. XX NO. 303 (ADOK 303)

DIMAPUR SANGTENNÜ (TUESDAY)

LUROI (AUGUST) 15, 2023

₹ 5.00

Terenlok mapa maneni inyaktsüla: La Ganesan Naga yimten teloktemi 77 buba Naga I-Day among



La Ganesan

Ganesan-i metetdaksü.

“Naga nungeri alima dang sobaliba, yartsüngsang aser ken kanga junga sayur aser Nagaland tejakleni aotsüba den azükarutsü atema yimjung nüngdaker. Anungji Nagaland nung alir ajaki yimjung ya mesamadaktsütsü merangtsüa” ta paisa ayongzük.

“Tesüba küm ishika tsüngda Nagaland state rongsenketzüng kanga junga kümogo. Asenoki human resource nung temulung agütsütsüla” ta pai ashi.

Kobi melii Nagaland medical college lapoktsü aser iba ajanga health sector kanga ajungkettsü ta Ganesan-isa ashi.

Nagaland nung university 4 dang lir anungji technical universities aser research institutes aika nüngdaker, ta paisa ashi.

Governor Ganesan-isa Nagaland nung gari lenmangtem junga yangludat aser tarutsü anogotem atema mapatong aika inyaktsü sentong lir ta metetdaksü.

“India nüjiso ngur küm 76 buba nung alima economy tulutiba rongnung asen linük jenjang pungububa nung lir. 2031 tashi nung asen linük 3rd largest economy akümsü. Asen sorkar ketdangsubaren aser temeten agütsüba inyakyim ajanga India ya democracy lima ka ta kuli agütsür” ta Governor-isa ashi.

Dimapur, August 14, 2023 (TYO): Naga yimjung maparen tenzükba sülen terenlokba mapa inyaka aruba nung timtem maludaktsütsüla ta Nagaland Governor La Ganesan-i ashi.

“Asenok asoshi tarutsü tajung lir. Asen chirnur aser tarutsü putu atema asenoki ibaji pelashishia agizüktsüla” ta Governor Ganesan-i 77 buba Independence Day amongtsü anogo ka lia ashi.

“Nagaland-i tashitait British anema rara aser Northeast India nung British nunger anema rara tulutiba rongnung Battle of Khonoma aser Battle of Kikruma züngshir” ta pai ashi.

“Nagaland-ia linük den külemi 1947 nungi mapang talangka lia aruogo. Tetenzüklenbo petsaprong aser mepetmesü liasü aser iba ajanga terenlok mapa nung timtem ajuru saka iba sülenbo tensa tiptema aruogo” ta

Independence Day sentong live sayutsü

Dimapur, August 14, 2023 (DIPR): August 15, 2023 nü Nagaland Civil Secretariat Plaza, Kohima nung 77 buba Independence Day sentong live sayutsü.

Anepdang 9:00 ako nungi

DIPR YouTube Channel nung iba sentong sayutsü anungji tejangrartemi <https://www.youtube.com/live/YzkIUJGt6Uk?feature=share> nung repringtsü akok.

Naga kaketshirtemi Naga yimten telok ajak longjemtsü aser taruba I-Day külemi amongtsü ayongzük

Kohima, August 14, 2023 (TYO): Naga Students' Federation (NSF)-i 77 buba Naga Independence Day sentong ayonga agidang Naga yimtenren telok ajak longjemtsü aser külem alizüng atema inyaktsü tayongzükba agütsüogo.

Naga Solidarity Park nung agiba sentong nung college kaketshir noklang aika den Manipur o Myanmar nungi Naga kaketshir teloktemi shilem agiogo.

“Asenok Naga nunger 1929 küm Simon Commission nem memorandum agütsüdang asenok linük balaka linür ta sangoktsüogo aser iba sülen August 14, 1947 nü Independence sangdong” ta Tenyimi Peoples' Organisation president aser Advocate Timikha

Koza-i ashi.

“Naga nungeri India kübok adentsü atema kodanga sign masü saka shinga kübok maliba nübortem ama alitsü sangoktsü. Naga nungeri Indian Union nung kodanga maden aser British yimsüsürtem dak alaka tangar shingai Naga nunger madak yimsü mesüdang” ta pai ashi.

“Naga nunger India anema rara memena saka India-i tashiyim agi Naga lima telungi ait aser ozüng tesashi yanglua benok. India sorkar den yimten ken o jembia arur saka parnoki tatemtsü balala amer atsülanga arur, ta Koza-isa ashi.

“Naga yimten putiotsü ya shingai melenshitsu makok saka India sorkari Naga yimjung olemtep agentsü tsübur. Anungji Naga nunger ajaki asen yimten



ISAK SUMI



MUIVAH



STARSON LAMKANG

Dimapur, August 14, 2023 (TYO): Naga yimten telok balalai 77 buba Naga Independence Day mongogo.

“Naga nunger ya pei sasa yimsü süa aruba nisungtem lir aser alemli nungi pei lima nung dang liyonga arur. Naga nungeri tangar dang nungi ali meshirba masü. Naga nunger li nung pei linük ka yangertsü temeten lir aser asen tarutsü asen sasa dang lemtetsü saka iba ya tangar temeten rakzükba ama mebilemstüla” ta NSCN-IM, Ato Kilonser Th. Muivah-i ashi.

“Küm 18 tashi yimten olmtep liyonga arur India sorkar aser NSCN-IM tsüngda August 3, 2015 nü Framework Agreement nung sign sütep. Iba ya Naga nunger putiotsü balaka aser pei sasa ketdangsuba litetsü ta agizükba tamendakdak lir. Iba ya telok anaprongi mulung agizükba kulikaket lir. Framework Agreement ya asen senmang lir aser asen asentzü aser azü agi alangzükba asünung kümzuka ayutsüla” ta Muivah-i ashi.

“Naga nunger pei sasa ketdangsuba nung wako aser temzüng ya mepitetsü aser iba ya ochi lir. India lennirtemia iba ya angateta lir anungji parnoki

ochi jembitsüla” ta paisa Council Headquarters (CHQ), Hebron nung agiba sentong nung ashi.

CFSB office, Padampukhuri, Dimapur nunga NSCN/GPRN Ato Kilonser Starson Lamkang-i Naga loktiliba nung yimjung aser telongjem alitsü indang nenshia metetdaksü.

“NSCN-i mezüng telongjem aser iba sülen yimten latetsü atema noktaker. Naga nungeri 77 buba Naga Independence day amonger saka asenoki kechi inyakteta lir. Naga nunger taginüba amadoker pei nija ajangzüktsü atema ang telok talila tentetogo. Anungji kin lennirtemi Naga nunger longjemtsü atema mapa inyaktsü ayongzük” ta Lamkang-i ashi.

NSCN ya telok khenyongi balaka lir aser Naga nunger ka aser linük ka atema noktaker, ta paisa shisem.

“Naga nungeri tebilemba tejanga metetdaksüogo aser tang joko India sorkar ket nung dang lemtet ka agitsü anünga lir. India sorkari dang yimten latetsü mesüra mapang atsülangtsü akok” ta NSCN/GPRN President, Akato Chophi-ia ashi.

Ajisüaka, 'National Principle And Traditional Values' madenba

lemtet ka agira tajunga kecha madokts saka yimtenren tsütsü timtem ajurutsü, ta Akato-i ashi.

“NNPGs-i India sorkar den political aser economic roadmaps renemba ya Naga nunger putiotsü aser yimtenren temetentem nung ajemdaka lir. 'Agreed Position' nung Naga nungeri tarutsü yangertsü atema temeten lir ta lateta lir aser iba ya Naga nunger tenüng W/C, NNPG-i mulungtepa lir. Iba ajanga dang Naga nunger shinga kübok maliba senmang bener arutetsü” ta GPRN, Ato Kilonser, Isak Sumi-ia ashi.

“Naga nüjiso atema inyakba mapa ya nübortem meyang lir anungji nübortem tarutsü atema telemtetba agitsü. Naga nunger madak yimsüsütsü atema ken o atsülangba ya magizüktsüla. Tebilemstü abenba Naga nunger shiai kiralongraba aser kechisarena ajak nung Naga nunger timtemdaksüba anema raratsüla” ta Isak-isa metetdaksü.

“Nübortem maginüba tashi ajanga küm aika Naga lima nung teraksa bentsür aruogo anungji asenok ajak longjemer iba tashi anema noktaksüla” ta paisa ayongzük.

putiotsü kümzuka ayutsüla. NSF-i lanuputu dang putiotsü angazükdaksüba atema tenüngsang agütsür” ta paisa ayongzük.

“Naga movement ya lokti longjemer tenzük saka tangbo telemsa, pei ajangzüktsü atema, telok balala lemsar aser kin o kin lemsar iba mapa inyaker” ta NSF president Kegwayhun Tep-i ashi.

“Tangar tashi ajanga asen nübortem divisive politics inyadaksür aser asen lennirtemi iba ya metetaka iba talenba nungi mesalanür” ta pai ashi.

Lanuputu anükertem aser shisatsü agütsürtem ama NSF-i telok balala tsüngda yimjung aser telongjem alitsü ayongzük, ta paisa ashi.

“Naga nüjiso atema inyakdang taküm bendanga agütsürtem nem tetushi agütsür. Parnok indang otsütem tanü tashi tar nunger otsü ama jembir aser parnoki bendanga agütsüba yong dang tanü asenok nem Naga lima moatsüogo” ta Tep-isa metetdaksü.

“Eastern Nagaland nung alirtemi state balaka meshiaka Naga nüjiso atema inyakba nung onoka dena lir aser Naga nunger temeten atema raraba nung onok maneni adentsü” ta ENSF president Chingmak Chang-ia ashi.

“Naga nunger ya temulung nung bilemba arrtsütem ajanga lemdanger alir saka taginübabo ka dang. Naga yimten telok aika lemsaba atema sasaa bilemer” ta pai ashi.

Lanur aser kaketshirtem teloktem külemi longjemtsüla aser Naga yimten teloktem dang taruba

Naga Independence Day yabo tesem ka nung külemi amongtsü atema longjemtsü jembitsüla, ta Chingmak Chang-i ashi.

“Naga nunger melongjemra asenok talangka moutetsü” ta paisa shisem.

Iba sentong nung Eastern Naga Students' Association (Myanmar) president Atimiu Makury aser All Naga Students Association Manipur social & cultural secretary Sochuingam Kashung natia o tatsütsü jembia.

Tanep NSF office nungi two-wheeler rally ka tenzük aser ibaji Solidarity Park nung tembangdang Koza-i Naga linük wako sala.

Sentong nungsa Kohima Baptist Pastors' Fellowship pastor temi Naga lima atema sarasadem.

Sorkar teyari medeni GPS Medical Colony nung classroom ka den sorochiokdak yanglu



Majakong Ward Chairman, Marchiba Imcheni Aug 14 nü GPS Medical Colony Majakong Ward nung classroom ka aser kitchen tasen asüba lapoktsür külen tangokba noksa nung angur. Mokochung, (August 14, 2023)

Mokochung, 14th Aug (TYO): Govt. Primary School, Medical Colony, Majakong Ward, Mokochung nung taktang ka den sorochiokdak joka (kitchen) asüba Aug 14, 2023 nü Majakong Ward Chairman, Marchiba Imchen-i meraketa lapoktsüogo. Mokochung Town Baptist Arogo (MTBA), Assoc. Pastor, Rev. P. Chuba Jamir-i iba ki meshitetsü.

Marchibai iba ki lapokja jembidang, sorkar nungi teyari kecha medeni School Management Committee (SMC) ketdangsüba nung nübur teyaritap ajanga iba ama ki tobur

junga yangertetba asoshi pelaba den alima dang tatishtisü tajung sayuogo, ta ashi.

Classroom tajung yangertetba amaji iba school nungi kaketshir tajung adoktetsüsa nenok dak aketba sempet tajungtiba agi sayutsü paisa ajungshia liasü.

School Management Committee nunga teti dangbo malitsü aser tesayur mapajia akümüli piyongbo meinyaktsü, kenübo retire asütsü mesüra kümsük abensatsü, anungji, mapang tatsüka inyakdang aser tarutsü nung mesasatsüsa pei mapa nung nendaka, tajungtiba nung bendanga agüja inyaktsü

paisha ayongzüksem.

Sentong nung Rev. P. Chuba Jamir, Majakong SMC Chairman – Sashimeren, SMC Secretary & GPS Medical Colony Teacher In-charge – Imnasenla R aser Repabenba GB parnokia shilem balala agia tepela o den tayongzükba o balala bener arua tesentepertem ayongzük.

Iba ki ya sorkar teyari kecha medeni Majakong Ward yimden aküm nung Majakong SMC kümsük ana - 2019-2022 aser 2022-2025 ketdangsüba nung GPS Medical Colony tesayurtem aser temulunger telok aser kijatemi tenlateper asüba lir.

Rural employment atema Longkhim nung training agütsüba temogo

Kohima, Luroi/August 14 (TYO): Nagaland Khadi & Village Industries Board (NKVIB) aser Glocal Concepts Nagaland (GCN) lungjemer Tuensang district kübok Longkhim nung asemnü 'Skill training for rural employment' sentong ayongzüka agiba August 11 nü tembangogo.

Iba training ya trades pezü - Food Processing, Toilet & Laundry Soap making, Upholstery Carpentry aser Beekeeping nung agüja liasü aser yangji nisung 361

arua dena liasü.

Iba sentong shibangba aser kulizüing kaket agütsüba sentong Er. Keyileuteing Nandang, EAC Longkhim lenisüba kübok agia liasü aser Anoka H. Assumi, ADC Longkhim ajanga training tembanga agiba kulizüing kaket training agirtem nem agüja liasü.

Pai iba mapang training agirtem dang parnokki angazükba shisatsü amshia district aser talisa sub-division nung temelenshi tajung bener arutsü ayongzüka liasü.

AKM office nunga Naga nunger Wako atsüketba sentong ka



Ao Kaketshir Mungdang Tir Sb.Lanutoshi Aier-I Naga nunger wako atsükettsür kelen Prof.Dr.Lanusashi Longkumer aser AKM lenirtem külemi tangokba noksa

Mokochung, August 14: Naga nunger nüchiso anogo nungtem nung August 14 anepdang Ao Kaketshir Mungdang(AKM) office nunga Naga nunger Wako atsüketba sentong ka AKM-i "Significance of Hoisting the Naga National Flag" ta asüba omen nung

ajemdaker ayongzüka kaogo. Naga nunger nüchiso anogo nungtem nung Ao Kaketshir Mungdang Tir Sb.Lanutoshi Aier-i Naga nunger wako AKM office kima atsüket aser Prof.Dr.Lanusashi Longkumer-i omen dak ajemdaker sentong nung adener den jembia ayongzük.

State kübok tesem balala nung Meri Maati

Dimapur, Luroi/August 14 (TYO): Linük den külemi Nagaland nunga tesem balala nung August 14, 2023 nü Meri Maati Mera Desh campaign ayongzüka liasü.

DIMAPUR:

India nunger nüchiso ngur küm 75 ajungba nungtem nung Azadi Ka Amrit Mahotsav (AKAM) kübok Dimapur Municipal Council ajanga Ramakrishna Society Premises, Duncan Basti, Dimapur nung August 14, 2023 nü "Meri Maati Mera Desh" aser Har Ghar Tiranga campaign tenzükba liasü.

Iba sentong nung Deputy Commissioner, Dimapur, Sachin Jaiswal, IAS ajanga National flag asong aser Memorial Plague saya.

Iba sentong nung shilem agirtemi Panch Pran Pledge agi aser District Administration, Police aser DRDA ajanga lenmang tezülen süngdong tema liasü.

AOYIM VILLAGE:

Meri Maati Mera Desh aser Har Ghar Tiranga campaign ya Azadi Ka Amrit Mahotsav kübok Aoyimti nunga August 12, 2023 nü tenzükba liasü.

ADC, Chumoukedima, Dr. Kuzonyi Wideo ajanga linük nisan asong aser memorial plague sayatsü. Pai iba sentong nung o tatsüka jembidang, village council chairman aser züingsemtem, lanurtem,

kaketshir aser nüburtemi iba sentong nung shilem agiba asoshi pelaba lemsatepa liasü.

Pai iba dak sendakba nung sentong balala ayongzüktsü lir ta metetdaksü aser yimdaklir temia maneni shilem agitsü ayongzük.

Iba campaign nükjidong ya India lima aser nüburtem tasü aitba benjongtsü aser India nunger nüchiso ngur küm 77 ajungba yimya balaka nung benjongba lir, ta pai ashi.

Iba sentong nung yimtsüing shia süngdong 75 atemba pre-plantation drive aser ali bendena Delhi nem August 27 nü agütsütsü aser August 30, 2023 nü benjongmung tatembangba amungtsü, ta pai ashi.

India nung yimtsüing 2,55,326 aser urban local bodies aser town committee 89,640 nung iba sentong ya August 9-15 anogotem amunger, ta pai ashi.

Iba anogomung bilemteta ADC ajanga tenanzüktepa ka agi aser süngdong tema liasü. Maneni Aoyimti Village Council chairman ajanga melepzüing o jembi.

M O K O K C H U N G V I L L A G E:

Meri Mati Mera Desh tenzükba sentong Ongpangkong (North) Block (GPS Arjuma Mokochung Village) nung August 12, 2023 nü agia liasü.

Iba sentong nung o tatsüka jembidang Deputy

Commissioner, Mokochung, Thsuvisie Phoiji-i India senso tajung ka ama tejangraba tulu nung iba sentong nung shilem agirtem dang pelaba lemsatep.

Mokochung district nungi tasü tait molungjang aika adokogo aser parnokki linük asoshi takum bendanga agütsü, ta pai ashi.

Iba sentong nung Shilaphalakam meshitet, Veeronka Vandan tetushi agütsü, Mitti den Panch Pran Pledge agi, linük nisan asong, linük ken aten aser süngdong tema liasü.

Iba sentong nung Divisional Forest Officer, Dr. Sentitula-i tayongzükba o jembi aser Wapang Kichu, VCC Mokochung Village ajanga o tatsüka jembia liasü. Iba sentong nung Project Officer DRDA, Mokochung, Imyapangla menden liasü.

INDISEN VILLAGE:

Azadi Ka Amrit Mahotsav tembangba Meri Maati Mera Desh sentong ya Indisen Village Panchayat Hall nunga August 12, 2023 nü munga liasü.

Sentong nung o tatsüka jembidang EAC Dimapur, Imlijungla Lemtur ajanga Azadi Ka Amrit Mahotsav kübok Meri Maati Mera Desh aser Har Ghar Tiranga campaign indang rateta ashi aser ibai linük nüchiso anguba aser tejakleni aoba bilemteta amunger, ta ashi.

Mera Desh campaign kaogo

Iba campaign ya ajanga nüburtem molungjang nung linük asoshi tejak tenteta bilemba lidaktsütsü aser linük senmang wazüka ayutsü asoshi tarutsü ajungmesotsü, ta lai ashi.

Iba sentong ayongzüktsü asoshi putu menden ajanga sapang agütsüba atema lai pelaba lemsatepa liasü.

173 Bn CRPF, Airfield indang Commandant JH Mondal-ia o tatsüka jembidang linük asoshi bendanga agütsürtem dang pelaba lemsatepa liasü.

Iba sentong nung JH Mondal-i linük nisan asong aser monolith sayaba sülen shilem agir ajungai mitti plegde agia liasü.

Iba sentong tembangba sülen Imlijungla Lemtur aser JH Mondal nati Panchayat Hall kima süngdong tema liasü. Iba sentong nung Indisen village indang VDB secretary Sunep Lemtur menden liasü aser council chairman P. Imsutoshi Ao-i melepzüing o jembi.

MANGKOLEMBA:

Addl. Deputy Commissioner (ADC) Mangkolemba, T. Langkosen Tsanglao-i August 12, 2023 nü ADC Office, Mangkolemba nung Meri Maati Mera Desh campaign tenzükba liasü.

Veeron Ka Vardhan nung shilem ka ama Ex-servicemen Union Mangkolemba, E Coy. 2nd NAP Tsutapela, F Coy.

9thNAP(IR) Mangkolemba aser SDPO Estt. Mangkolemba, DEF Mokochung nem kulizüing kaket agüja liasü.

Iba sentong nung ADC Mangkolemba ajanga linük nisan asong aser SDO (C), Hotolu Sema-i anir Panch Pran pledge agia liasü aser office balala nung süngdong tema liasü.

CHÜMOUKEDIMA:

Chümoukedima district administration aser police temi August 14, 2023 nü Chümoukedima Town nung Flag March agia liasü.

Iba Flag March ya Deputy Commissioner, Chümoukedima, Abhinav Shivam, IAS aser DCP Chümoukedima, Munesh, IPS lenisüba kübok police personnel, administration aser GBs temi ahia liasü. Azadi Ka Amrit Mahotsav aser Har Ghar Tiranga nungtem nung iba sentong ya ayongzüka liasü.

Indian senso ama linük meimba sayutsü aser nüburtemi law & order machinery nung tamang kadaktsütsü aser ano police aser nüburtem tsüngta tesendaktep tajung yanglutsü mechi iba sentong ya ayongzüka liasü.

Iba Flag march ya Chümoukedima Town Council office nungi tenzük aser CT Square, Chümoukedima nung tembang.

Himachal nung tzunglu dak sendakba lendong nung nisung 50 dak tema süogo

Shimla, Luroi/August 14 (Agencies): Tesüiba ghonda 24 tsüngda Himachal Pradesh state nung tzunglu dak sendakba lendong balala nung nisung 50 dak tema süogo, ta Hombarnü Chief Minister, Sukhvinder Singh Sukhu-i metetdaksü.

Chief minister-i, Himachal nung tzunglu maneni aruba ajanga ghonda 24 tsüngda nisung 50 dak tema asüba ya

tang mezüng asütsü, ta metetdaksü.

Himachal nung tzunglu maneni aruba ajanga anentsüh, tzümsüng aser tsüingi lendong kanga bulua ataloker. Tzüngluruwa mongpu dak sendakba lendong agi tamajungtiba kongshiba district anaji state yimtiba, Shimla aser Mandi na lir.

India Meteorological Department (IMD)-i

Hombarnü tzunglu sashia arutsü aser tzunglu 204.4 mm dak tema arutsü, ta jelia metetdaksür liasü.

Tzunglu maneni aruba ajanga Himachal nung Independence Day sentong dak sendakba tsütsü timtem agütsür, ibayongji CM Sukhu-i sobaliba sentongtem ajak thinenogo.

Independence Day anogomong nung linük wako

dang asongtsü, kechiyong iba anogomong atema mapa lezmükja aliba police aser disaster response sepaitem ajak kümzükba aser teyari agütsüba maparen nung mazüingi lir, ta Chief Minister-i metetdaksü.

Tesüiba ghonda 24 tsüngda asürtem rongnung Shimla nung tatalokba ana nung nisung 12 asüba aser Mandi nung nisung 19 asüba densema lir.

Shimla kübok Summer Hill

anasa aliba Shiv Mandir anentsüh agi anebanga liasü, aser iba tesem nungjagi tasü mang 8 agitetogo.

Chief Minister-isa, Union Home Minister Amit Shah, Congress Tir Mallikarjun Kharge, Congress lenirtem-Rahul Gandhi, Priyanka Gandhi aser BJP Tir, JP Nadda nungeri pa dang phone ajanga parnokki akokba tashi yariteptsü ta shiogo, ta metetdaksü.

CBC 22201/13/0041/2324

77buba Independence Day nung senso ajak den salem lemsateper.

Jai Hind

Nüchiso indang Amrit
Kaal ya linük nem
lenmang tasen ka
agütsütsü atema
maongka lir. Iba Amrit
Kaal ya mangdang
aser nükjidong aika
tongtetsü mapang ka lir.
- **Narendra Modi**

Red Fort nung Independence Day sentong tagidak anepdang 6:15 ako nungi Door-darshan Network nung reprangang.





TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 15, 2023

Nüchipur memesük

Tanü India ajaklen la yimten nüchiso ngur nuchisomung 77 buba amunger. Atangji, India ama kin kidong, oshi aser tamangba yimsü tapu balala zünger mezüngma aliba alima tulu ka telongjem meraksai küm 77 buba tashi arutetbaji takok tuluka lir. Iba takokjibo yimten telok ka kija meyong masü saka India nunger tulu tila ajak meyong takok asütsü. India yimten nüchiso anguba ya jungjunga bilemdangra, British nungertemi yanglur agütsüba yimten ka lir ashitsü koka lir. Aji oda, India nungertemi British nungertem India nung aruagi shishilembatsü tenzükba nungi yimten tashi amshia yimsüsütsü tenzükba mapatem agi India nunger akoksadaksü amai jembir, ajisüaka jungjunga bilemdangra, tanü India ta ser aliba linük ya British nungertem aruagi longjemtsüba lima ka lir, kechiyong British nungertem aruba mapangbo tanü temzüng ka kübok longjema aliba India ya masü saka kin shia pei pei chuba yimli tilala kümtetter yimsü süa liasü. Aji oda, British nungertem ya India nung arua mamenok ka asüa, tanü India ta ajaba lima ya kechi koma lima ka kümer lila ta bilemer. Ibaji dang masü saka British yimli agi India ajunga amokbanger yimsü tesüdak nung, India yimten nüchiso jenjang ka atema inyaksü atema ajungmesua Indian National Congress tentetdaksüsangbo British yimli nung ketdangser, Civil servant, Allan Octevian Hume liasü. Aji oda, A.O.Hume-iang India nunger yimten lenirtem ayongdena INC tenzükpai iba telok nung tezülur ser India yimten nüchiso atema nokdaksü jenjang tajung ka alangateta toktsüba kimung nung tanü India amenoka lir. Iba amaji 1885 nungi Indian National Congress nung tamang yimsü tsütsüa Hindu, Muslim aser Christian-tem ajaki pei pei yari India yimten nüchiso asoshi inyakba angur. Atangji, India ya Hindu nunger teimba aliba lima ka lir, ajisüaka iba jagi India ya Hindu nunger kija lima ta masü saka India yimten nüchiso asoshi bendanga agüja inyaker India nunger ajak meyong lir. Aji oda, India ya Hindu lima ka akümtsü asoshi Indian National Congress tentet asübo INC nung inyaka arur ketdangpurtem rongnung tanga yimsü amanger, talisa, Muslim aser Khristan purtem melila. Ajisüaka, tanübo taoba küm 77 jakdang pei nübo, rongsen aser taküm ajak bendanga agüja India yimten nüchiso asoshi inyaker temi inyakba tenlatem ajak amadoker, India nung tamangba yimsü ka aser temzüng ozüng tapu ka dang alitsü ta jembibaji nüchi mangurtemi jembiba o dang asütsü. Ano, India nung nung telok tulutiba Hindu nungertemi metettsüba kaji, alima rangben nung India aser Nepal dak alema Hindu nunger longsua aliba lima mali. Alima teimbaka Muslim aser Khristan purtem alidak limatem lir. Item Muslim aser Khristan limatem nung Hindu nunger senso kuma alir takar aika lir aser India nungi ayangi aortema item limatem ajak nung prokshia ayanger. Aji oda, kodang Hindu nungertemi India nung telongsu apia parnok sünütsü süa Muslim aser Khristan-tem anema inyakdir, India asoshi timtem aser takoksa tulu ajurutsü ana nung lir. Tanübo India tesem aika nung küm 77 tain nüchi purbo memesük inyaker. Tang tashi mangsa tsüngrem külemer aser nisung dangbo shiruru temeimba meima amshir. Aji oda, India ya Nagaland ama kin kidong aser tamangba yimsü ajak sademsadema amanga alidak aser kati ka sobaliba akümtsüba benshidak asütsü melen, India nunger tajung kümdaktsüba tamangba yimsü anema inyakra aser chia ajemba sobaliba tashi nung government-i tashi amshitsü merangra, tang aliba India yagibo küm 100 saksakang tongtettsü. India telongjem meraksai taküm alitsü asoshi election nung ozü teloki kokra ojang aser ozü teloki government kümtetra ojang ta asüba tangatetba masü, saka ozü teloki inyakba ya India asoshi shitak na (?) ta bilema inyakbajang tim asütsü. India nüchiso kümer küm 77 buba amunger saka Manipur nungbo yimsüsürtem dena tetsübu agi nüchisomung sentongi moutettsüa timtem tetsübu tia nung lir. Haryana nunga tamangba yimsü ana tsüngda tsükchiteper aser India nung Khristan-tem tali tali reshikangshir ta asüba tensa mapang ka nung, amungbo nüchisomung saka mapabo nüchi masü ta ka nung India nüchisomung 77 buba mangmanga amunger.

OLEMSABANG

AZÜ (BLOOD) MERUK-MERUKA ASÜNGTETA AYUTSÜLA

~ L. Kika Pongener.

(Yashi adok nungi...)

Asen mimchirtem-ibo alima nung ya putusa putu asenok dang meren-merena ita anu amai sentsüwangshia alitsü amai bilemer, yongji, asenoki ken o-a tulu-lu jembir aser mapa-a tenük amour tulu-lu inyaksangshir. Tanü asen ket nung tashi (Power) lir ta ser, mesura rongsen kaa-ita lir ta ser, mesura nutsüng-nubu aika nubensor-a ta ser, shinga tenük agi mangu jembir aser inyaker. Ajisuaka, asenok ya melentepa aliba lima ka nung alir ta metettsüla. Tsüngrem o-i ashiba amaji, asüngji anogo-i kechi bentsür arutsü'ar shingaia meshitet. Tanü putu nung kanga tesasatsüka, tulus/takar chirnur aika mozü-lar aser yi-lar kümer Rehab Center/Jail nungang lir-ko, saka tilar/sensaker chirnur aika tulus menden nung mena lir. Tsüngrem o-i ashir, "Pai (Kibubai) ali nungi sensaker ajungketer aser maka-maiter ruja nangdendak nungi ajungketer" (T.Ken-113:7). "Ni alartem kor nung sanger angu aser chubatem alar ama ali nung jaja-a angu" (Sayu-10:7). Ano Tsüngrem o-i ashir, "Tang ajiangjo takartem, nenok madaki kechi timtem arudagi, aji asoshi jebang aser ayimtenang. Nenok rongsen sama-a aor aser nenok suoshi tarutsü agi achir. Nenok hon aser taribi sung agi chimar" (Yakob-5:1-3). Ashiko, nai bendenba rongsen ajunga chireptsüba sungji (Rust) tanga kecha masü, saka ner jala-jabaso kari chireptsütsüa shibai metet...!!! Aseni bendenba rongsenji ashiko, aseni kodanga meimlaba nisung kar keti-ang aotsüa shibai metet...!!! Tesasatsüka, tanü putu nung chuba amai sentsüwangshia meren-merena lia aliba tulus/takar ki aika sentsüh-yong tangari Dala agi shipangtsüba (Locked) lir-ko...!!! Tsüngrem o-i ashir, "Temenenpur rongsenji temeshipur asoshi rizünger" (A.Shin-13:22 b).

Anungji asenoki asen azü (Blood) kanga dang asüngteta aser merukteta yudi. Tangari nguaka aser monguaka, metetaka aser memetetaka asenoki mapa tajung inyakdi. Tangari züngshiaka aser mezüngshiaka asenoki ochishia asen taküm asüngteta meshiteta lidi. Ashiko, tanübo asen jenjangji shingaia mezüngokba nisung/kidong/kin ka asütsüa akok, saka asenoki ajemalua tila kümer, asen azü-ji asüngteta meruka yutetra, mapang kabo Tsüngremi asenok ajungkettsü aser moatsütsü. "Temeshibai kin ka ajungkettsür" (A.Shin-14:34). "Ajemalur-i alima senmang amangtsü" (T.Ken-37:11). "Temeshipur senzüka yutsüba aser pa metsü meshimetsüba ni mangu." (T.Ken-37:25). Atangji Dawid-i ashiba ama, Temeshipur dak jakzükba chirnur/semchi-semnur Tsüngremi sentokba aser meshimetsüa alir shinga mali. Ano Tsüngrem o-i ashir, "Asüküm agi teraksa adokdaksür aser ngasangadem agi ludaktsür" (A.Shin-16:18). "Kodang asüküm arur idangji maaksu arur" (A.Shin-11:2). Asenok koba-teka shia-metetaka aser kaa-ita-ulua liaka, item tashitemetet aser uluba ajungaji asen tasü-nu leper nung temang den külemi aremtsü. Ajisuaka, asen azü (Blood) aseni asüngteta meruka yutetra, iba senmangjibo putusa putu senmangtepyonga aotsü. Iba senmangjibo shingaia rakzüktsü/auyatsü makoktsü aser tenükmerem agia jungnatsütsü makoktsü. Anungji asenoki asen azü (Blood) asüngteta meruka yudi. Asenoki yamaji yutetra ajibo hon-taribi aser senti rongsen dang nungia kanga agia taoba asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mumbai anasa St. Gonsalo Garcia Arogo Tenla ki amak



August 11, 2023 nü Mumbai nung aliba St. Gonsalo Garcia Tenla ki amakba sülen tangokba noksa nung angur.

August 14, 2023: Mejangjaba nisung kari Mumbai anasa India nungertem rongnung Khrista atema mezüng asür ka nüngtem nung jatsüba Arogo Tenla ki ka amak.

August 11, 2023 nikongdang Mumbai nungi kilometer 45 shi pilar aliba Vasai diocese kübok St. Gonsalo Garcia Arogo Tenla ki amakdang Tenla ki raksatsü aser Tenla ki sabang ajak raksatsüba den külemi osangtajung kaketter raksatsü, ta Arogo nung tongti putiri metetdaksü.

"Shirnoki Tenla ki raksatsüar onoki memetet. Nikongdang 5:30 ako meta onok Tenla kidangi aruba mapang nung ang Tenla ki amakbaji onoki meteta liasü," ta putir Peter Almeida-i osangbener nem metetdaksü.

Vasai nung tongti putir, Felix Machado-i, "Tenla kidang kürakyanglu aser temeshi osettem raksatsübaji aitsütsü tetemsü. Ni-a ibaji aitsür," ta metetdaksü.

"Iba tatalokba ajanga Khristantem aser Vasai nung Arogo temelung yirutsüogo. Item ama tatalokba ya ajanga sensotem tsüngda tesendaktep raksatsütsü," ta paisa shisem.

Watch Foundation nung züngsem, Godfrey Pimenta-i, "Iba ya jelia asalentong yanglur inyakba lir. Police-i aibelenertemji aputsüla," ta ashi. Vasai nungi Franciscan, St. Gonsalo Garcia ya India nung Catholic Arogo nungi Khrista atema mezüng asür lir, aser pa nüngtem nung iba Arogo nüngja agüja liasü.

1509 küm Portuguese nunger Vasai-i aruba sülen region nung mezüngbuba Tenla kiji 1535 küm Vasai Fort nung yanglua liasü. St. Garcia den Franciscan missionary tem telok ka Japan-i oa liasü, aser 1597 küm Japan kübok Nagasaki yimti nung pa den nisung 26 nem tiyazü nung tai tonglokja, parnoki linük anema inyakogo, ta aija tepseta liasü. Bombay East Indian

Association-ia iba tatalokba aija sangdong ka ajanga ka, "St. Gonsalo Garcia ya Khristantem atema temeshi nisung ka dang masü saka sobaliba balala aser yimsü balala amangertem tsüngda longjemdaktsür ka liasü," ta metetdaksü.

"Aibelenertem aputsü atema asenoki inyaktsüla," ta association-isa metetdaksü.

Osangbenertem den jembidang Manickpur police station nung senior inspector, Ranjit Andhale-i, police-i iba tatalokba bushisüngdangdar, ajisüaka Tenla kidangi CCTV maliba agi onok tetsükdaktsü ajurur," ta metetdaksü.

Iba tatalokba sülenbo Arogoi Tenla kidang security cameras ayutsü telemtetba agiogo.

August 6 nüa Vasai nung nisung 15-i tekülem sentong tagidak mapang nung timtem agüja liasü aser Protestant pastor ka dak azük.

Protestant pastor ji tang tashi hospital nung mongdar.

Gospel Music Association-i Dove Award nominations sangdongogo

Nashville, August 14 (Agencies): 54buba Dove Awards atema Gospel Music Association (GMA)-i nominations sangdongogo; Khrista osangtajung kentener Brandon Lake, Artist of The Year aser Worship Recorded Song of the Year densema category 11 nung nominate süogo.

Brandon Lake-i aseben tashi Dove Award ngua lir aser taküm-a pa indang ken "Gratitude (Radio Version)," aser "Honey In The Rock" ajanga nominations aika angu.

Kasa category nung Chris Tomlin indang ken "Holy Forever" aser Phil Wickman indang ken "This Is Our God" shima lir. 2021 küm Lake-i iba award ngua liasü.

GMA Tir, Jackie Patillo-i sangdong ka ajanga, "Taküm

Dove Awards atema nominate süa alirtem nem ni tenüngsang agütsür. Küm shia onoki asen nüburttem aser asenoki iba benjung amongba nüngtem nung omen ka shimmer. Taküm omenji 'Joyful Echo' asütsü. Isaia 42:12 nung shia aliba ama T s ü n g r e m sentsüwangshidakjang aser tzüyinküm nungi tzüyinküm tashi Pa tenüngsang ken tennang," ta metetdaksü.

Artist of The Year atema nominate süa alirtem rongnungsa CeCe Winans, For KING & COUNTRY, Lauren Daigle aser Phil Wickham nunger densema lir.

Song of the Year atema nominate asüba kentemji- "Build a Boat," "Fear Is Not My Future," "God Really Loves Us," "Goodness of

God," "Gratitude," "In Jesus' Name (God of Possible)," "Love Me Like I Am," "Perfectly Loved," "Same God" aser "Then Christ Came" lir.

Ano category ana dak tali nung nominate süa alirtem rongnung Kirk Franklin, Jeff Pardo, Katy Nichole, Lauren Daigle, Jason Ingram aser Tasha Cobbs Leonard nunger densema lir.

Country kentenertem rongnung tang mezüng iba award atema nominate süa alirtemji Dylan Scott, Tyler Childers aser Walker Hayes nunger lir.

GMA Dove Awards sentong ya taküm October 17 nü Nashville nung agütsü, iba sülen October 20 aonung 8:00 ako aser 10:00 ako nung TBN aser TBN app nung sayutsü.

ANO GO ABEN TSÜNGREM DEN

Tindang Aser Shitak

T.Ken 119:137-144

Kodangsa asenoki dokan nung oset alidir tajung, majung tendanger junger ta kuli zülua aliba repranger junger ta zülua aliba osettem alir. Kasaji chiyongtsü nunga tajung ta zülua aliba chiyongtsütem alir.

Tsüngremer O ji tendanger shitak ta ngutet. Ibaji kuli tejanga lir. "Ne tenangzükbatem tendangogo aser aji atangji, aji asünung ne tenzükeri aji meimer" (t.140). Ibai mi tesashi ajanga tendangba lir. Hon temeja metettsü asoshi mi tesashi nung tendanger, taribia yamaji tendanger. Asenoki Arogo otsü zünga aser Laishibaji reprangra, Tsüngrem O ji mi ajanga aoba angutsü. Abrahami ibai tendang aser shitak ta ngutet. Kongi aotsü memetet pai par ki toktsür ao saka pa Tsüngrem O kar liasü, aser Tsüngremi pa angu. Mosaia arem nung küm lir alidang Tsüngrem O tendang. Tenüngsang Ken nung Dawidi mi ajanga aoba asenoki angur. Pai kechi inyak ? Pai Tsüngrem O ji tendang.

Laishibaji tendang aser tetendangba nung takok angu. Ibai ochi, tiyazü kecha maten. Anungji ibai ajaki amangtsü akok. Otsü ajunga nung shirnoki Kibuba dak amang parnoki ashitsü akok, "Nai Tsüngrem O dak metaloktsü akok."

Nai ne taküm nung Tsüngrem O ji tendanger asü? Na tang mi tesashi ajanga aotsü akok. Yamaji ka süra, nai timtem aremzükba kuli kaji Tsüngrem O ji temerük, tasüngtet aser amangtsü tetemsü ta nai kuli angutsü. Ne sasa Tsüngrem O ji tendangang aser ibaji atangchichila ta metetang.

Iran nunger Khristan ka tepuokdak nungi chiokogo

Zaman Fadaei



August 14, 2023: Iran nung Islam yimsü toktsür Khristan yimsü agizüker ka küm trok tepuokdak ayu aser küm ana tashi linük nungsa süaka tezülen meindokba sülen tatok agütsüogo.

2016 küm May ita nung Zaman Fadaei den pastor Yousef Nadarkhani aser Islam yimsü toktsür Khrista agizüker asem pua liasü.

Zaman-i linük security anema inyakogo, ta aija küm ter tepuokdak ayutsü obendang agütsüba den külemi küm ana tezülen oa lidaktsü.

Ajisüaka 2020 küm pa küm 10 masü saka 6 dang tepuokdak ayutsü tuyua liasü. Pai Kibuba benjung nung yi (Yisu zü temaitsü) ajemba atema pa dak

80 ben arep. Ajisüaka 2020 küm February ita nung 1979 küm Islamic Revolution anogomong nüngtem nung Iran nung Supreme Leader, Khamenei-i Zaman aser Yousef na den tangartem dang tai atok.

Ajisüaka parnok bail atema jail-i kakat kar abeni aoba mapang nung ano apu, aser parnok tezüleni oa alitsü tetuyuba agüja liasü.

Parnoki house churches ayongzüka agiba aser Zionist Christianity ajungkettsüba atema nisung shia dak 50 ben arep.

Tatamsa August 10, 2023 nü jail ketdangsertemi pa joko tezülen malitsü tetuyuba agütsü. Pastor Yousef Nadarkhani bo tang tashi tezülen lidaktsüdar.

AO OSHI ANGAZÜKDAK:
TANÜ ANGAZÜKTSÜBA OJANG



Ropet

(v) totzü nung junga maro, nok nü junga maro (not fried well, not well tempered iron)

* Onok tanep aon junga maro ser achiba agi tepok raksa.

Rosep

(v) tzü ajema aküm (dry up)

* Tanü asüngbo tzübo nung tzü kanga melaa **roseper**.

OLONG PAITEP # 6606

1		2			3		4		5
			6						
	7		8						
9					10			11	12
			13		14	15			
16					17			18	
			19		20				
21		22							23
24									

TIPIEN

- 1. Saku - (4)
- 6. Songjen - (7)
- 7. Mali/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzunglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nüsü tebuba - (3)
- 5. Anügdang tesangwa - (3)
- 6. Apitel - (5)
- 7. Yagi jungdaksür - (4)
- 8. Anogo semer ka - (3)
- 10. ___ tatsü - (3)
- 12. Tebur kidong aser zünga kasatsüngdajatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6605 TELANGZÜBA

TIPIEN :


- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.



ALOKBA GYM NUNG :



Alokba : Tulus, ni aiürtem yakta puatsü atema koba machine amshi tajungba asütsü?

Instructor : Tetsürtem puatsü atema taa?

Alokba : Hau Sir.

Instructor : Kima ATM ji amshiangmal!

~ Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

CM Conrad-i Prime Hub aser Pineapple Processing Unit lapoktsü



CM Conrad-i Prime Hub aser Pineapple Processing Unit lapoktsüba noksa angur.

Shillong, August 14, 2023

(Agencies): Meghalaya Chief Minister Conrad Sangma-i Prime Hub Umdihar aser Pineapple Processing Unit lapoktsüogo.

Ribhoi district kübok Umdihar nung agiba sentong nung Chief Minister Conrad Sangma-i jenjang balala nung entrepreneurship ajungkettsü indang jembi.

"Prime Hub ajanga shishilembaba ajungkettsü. Entrepreneurship ya nisung mashü kati inyaktsü akok" ta pai ashi.

"Integrated village cooperative societies (IVCS) ajanga asen lokti nung entrepreneurship tangatetba agütsür" ta Conrad-isa shisem.

Paisa Chief Minister indang E-Championship Challenge

program osang lemsatep. "Iba ajanga entrepreneurs meyirjang aika ajungmesoba dang masü saka top 100 participants nem loan agütsü" ta Conrad-i ashi.

"Umdihar ya shishilembadak anasa lir aser railway station den tesentaktep lir. Umdihar ya Meghalaya-i linük den sendakteptsü aser rongsenketzüng tashitait tesem ka akümtsü" ta paisa metetdaksü.

Hynniewtrep Youth Council-i UCC magizüktsü ayongzüker

Shillong, August 14, 2023

(Agencies): Hynniewtrep Youth Council (HYC)-i Meghalaya nung Uniform Civil Code (UCC) mapa meinyaktsü metetdaksüogo.

HYC-i Chief Minister Conrad Sangma dang UCC anema bangzüng ka agitsü metetdaksü.

Parnokisa Meghalaya nung sobaliba aser inyaksangshi aser

autonomous district councils (ADCs) ketdangsubaren kümzüka ayutsü metetdaksüogo.

Law Commission of India-i July 5 nü sangdong agütsüba atema tebilemtsü abener ta HYC-isa ashi.

UCC mapa inyakba ajanga India nung federal structure nung timtem ajurutsü aser tamangba yimsü dak sendakba

inyakyim nung kongshitsü ta HYC-isa metetdaksü.

Instrument of Accession aser Annexed Agreement ajanga Khasi aser Jaintia Hills ya India nung tongtipang shilemtem aküm. Iba merger agreement ajanga India sorkari Hynniewtrep nunger sobaliba aser inyaksangshi kümzüka ayutsü nangzüker, ta HYC-isa ashi.

RBD firearms training camp atema nisung nem bail agütsü

Guwahati, August 14, 2023

(Agencies): Assam nung Rashtriya Bajrang Dal indang firearms training nung shilem agir nisung asem nem interim bail temelaba agütsüogo.

Par asem ya August 14 nü

Mangaldoi Police Station-i anir ao.

Par asem ya Subrata Das, Abhijit Ghosh aser Dinesh Kalita nunger lir. Dinesh ya Rashtriya Bajrang Dal Assam unit president lir.

July 24 nungi 30 tashi anogo

tenetnü training camp ayonga agiba atema Rashtriya Bajrang Dal (RJD) anema FIR ka benoka liasü. Iba sentong nung arishi küm 18 nungi 30 tsüngda lanurtem nem weapons training agüja liasü.

Indo-Bhutan arrtsü anasa güntok shikarir 3 apu

Guwahat, August 14, 2023

(Agencies): Assam nung India-Bhutan arrtsülen ozüing alema shikarir nisung asem puogo.

Chirang district Forest Department aser Wildlife Crime Control Bureau (WCCB) ketdangsurtemi Deobarnü par

asem apu.

Parnok ya Biren Narzary, Noweswar Basumatary aser Nal Bahadur Magar nunger ta jangjaogo. Parnok ajak ya Chirang nung alir.

Parnok ket nungi güntok tetsüing, teküp, handmade pistol

ka aser injangtem ngutetogo.

Par aseme tawa tu Manas National Park nung güntok ana kshetba nangzükerogo.

Ita ishika jakdang Manas nung güntok ana sür aliba ngua liasü aser iba atema bushisüngdanga arudar.

GOVERNMENT OF NAGALAND

HOME DEPARTMENT

GENERAL ADMINISTRATIVE BRANCH -II

Kohima, dated the 14th August, 2023

PRESS RELEASE

This is to inform that the State level function for the celebration of the 77th Independence Day being held at the Nagaland Civil Secretariat Plaza, Kohima on 15th August, 2023(Tuesday), 9:00 AM onwards, will also be live streamed on DIPR's YoutubeChannel.

Interested viewers can watch the event online by directly clicking onthe link

<https://www.youtube.com/live/YzkIUJGt6UK?feature=share>

(NUSIETARHAKHO)

Additional Secretary to the Govt.of Nagaland

N Korea lenir Kim-i missiles, shells timba yanglutsü tuyu

Pyongyang, Luroi/August 14 (Agencies): North Korea lenir Kim Jong Un-i tactical missile production plant ka densema injang yangluba factory tongtibangtem semdanga, missiles, rocket-launcher shells aser tanga hadirtem yangluba jenjang ajungketshitsü tetuyuba agütsüogo, ta state media sangdong ka ajanga metetdaksü.

Leniri item factory tem semdangba ya Hombarnü sangdonga liasü, koba Kim-i tawa defence facility tem semdanga prangbong injangtem aika yanglutsü atema tetuyuba agüja aruba nung tesüsabuba asütsü.

South Korea aser United States na annual military drill atema renemshiba mapang iba tetuyuba ya agütsüogo. South aser US na inyakyim ya North-i parnok amaktsü atema renemshiba ka ta shia arudar. Russia-i Ukraine nung rara atema North Korea dang nungi prongbong injangtem meshir ta US-i ashiba mapang ka nung tang Kim-i iba tetuyuba agütsüogo.

Official Korean Central News Agency (KCNA)-i ashiba agi, Kim-i tactical missiles, mobile launch platforms, armoured vehicles aser artillery shells tem yangluba factory tem Hokolbar aser Honibarnü semdanga liasü.

Missile factory semdangba mapang Kim-i, yakbang nung inyaksangshiba military unit tem nungdak peritsüts atema missile tem aika yanglutsü asoshi production capacity ajungketshitsü atema nukjiodong

ka yuogo. "Rara atema renemshitsü ya munitions industry terenlok dak metaloker lir aser Korean People's Army rara atema takaratiba nung renemtsü atema factory temi tongtibang khuret ka abener," ta Kim-i ashiba kasa sangdong ajanga metetdaksü.

Tanga factory tem semdangba mapang Kim-i, modern missile launch trucks tem tali yanglutsü ayongzükba den large-calibre multiple rocket launcher shells tem takaratiba nung yanglutsü atema tang jongdak nungdak ka lir ta ashi.

Kim-isa, utility combat armoured vehicle tasen ka anidanga liasü, ta KCNA-i ashi.

2019 küm taoba US tir Donald Trump den sensaksem chirepba sülen Kim-i, nuclear aser missile arsenals ulushitsü atema rangloker inyaka arudar. 2022 küm tenzükba sülen Kim indang military-i missile 100 ben dak tema tendangogo aser item missile tem ya aika US aser South Korea na military training exercise tem aika ayontzuka agiba atema tekümdangtsü metetdaksüba ama tendangogo.

North Korea-i ano missile tem aika tendangtsü akok, kechiyong US aser South Korea na iba ita tatemlen summer military exercises tenzüktsüba lir.

North Korea-i, US-South Korean training ya parnok amaktsü atema training agiba ka lir ta shia arudar aser kasa mapang nung linük ana yagi parnoki North Korea amaktsüba kecha sentong mali ta shia arudar.

Kim-isa, kechi komala rara südir süaka rara ajak atema North korea ket nung military tashi tait ka alitsüla aser tsükchirtem meshimeshia samatsütsüsa renemer alitsü nungdaker, ta ashiba KCNA-i metetdaksü.

Mongintem aikati ashiba agi, US nongshitsü atema Kim-i prangpong hadirtem modernize asütsü nukjiodong lir aser Washington den kodang sensaksem tenzükdir idangji tenokdangba balala agütsür aliba amala agindaktsütsü atema parnok tashi ita kümer liner.

Iba ita tetenzüklen White House-i ashiba agi, US intelligence ketdangsurtemi Russia Defence Minister Sergei Shoigu-i taoba ita Pyongyang semdangba mapang North Korea nung ketdangsurtem den ajurutepa Ukraine rara nung amshitsü atema Moscow dang injangtem tali ayoktsü atema asüngdangba jangja kümogo.

Washington-i, North-i Russia nem artillery shells aser injangtem agütsüogo ta ashiba North Korea-i magizüki arudar. Ajisüaka parnoki yimjak nung Russia pusema arudar aser Ukraine nung Russia-i atsünger aliba tesemtem yanglushitsü atema mapang inyakertem yoktsü ta shiogo.

US-i anir parnok indang nuclear programme tem dak sendakba nung tenongshiba balala aliba aser wara poktetba ajanga rongsenketzüng nung tetsükdaksü adoker aliba mapang Kim-i China aser Russia na den tesendaktep yanglushitsü meranga arudar.

Myanmar nung anentsüh aluba sülen nisung 30 samar bushir

Hpakant, Luroi/August 14 (Agencies): Myanmar north tsütsü jade (sentilong tabu ka) mine ka nung anentsüh aluba sülen nisung 30 shi samar bushir.

Kachin state kübok tenem agi sünga aliba Hpakant jila nungya alima nung jade mine tulutiba lir.

Iba lendong ajurua alirtem ya aika yangji alirtem longren nung molushi ajanga ali telungi tua aiertem südi ta amanger, shirnok mining pits tejen nung inyaka yangji dang alir.

Myanmar nung May aser October tsüngta meyi tzünglu aruba mapang yangji anentsüh tesashi kanga alur.

2020 küm July ita kasa tesem nung anentsüh ka alua nisung 162 asü aser 2015 küma lendong ajurua nisung 110 dak tema asü.

Tzüngluruwa asüba yong mining operations anena lir.

Ajisüaka Deobar nikongdang 3:30 ako meta iba lendong ajururtem ya aika pei jurila jade bushirtem lir.

Mining company temi iba sentilong bushia ali tüzükba yatenba ya metre 150 tashi mejunga nangtena lir aser tzünglu kanga sashia aruba ajanga ali anenzüka alua anembang.

Iba lendong nungi jenbur temi ashiba agi, parnok jade bushia alia tuba mapang molushi, long aser tzümetzüng meyokteper parnok nembang.

Myanmar kübok iba tesem nung alinük ya tashi mait aser miima sentilong bushiba tesem noklang dak tema lir. Iba yongji linük tesem balala nungi aayangertem adenshia jade ya bushir, koba timbaka China nung ayoker.

Rescue worker kati Deobarnü osangbener dang ashiba agi, nisung 34 samar bushir aser nisung ti yirur mozü

kidangi anir ao.

Iba anentsüh agi anenbanga alirtem bushiba maparen maneni inyaker saka miner karbo joko iba sentilong ngutettsü teimla nung arua lir.

"Tang tashi tasümgang kata nguteta mali," ta nisung kati ashi.

Myanmar mitkar sorkari asoshi jade mining ya sen aruba lenmang tongtipang ka lir. Iba yagi ano Kachin Independence Army nema senotsü teyari agütsür.

Küm aika mitkar aser Kachin telungpur tsüngta iba Kachin state amokbangtsü meranga rara arur, kechiaser yangji aliba jade ya küm ka nung sen billion \$30 jenjang agiteter ta asadangteta lir.

Mitkar temi tashiyim amshia 2021 küm Aung San Suu Kyi-i aniba sorkar matsüngdok dang aser atsüngdokera mapang shia yangji rara aru.

OFFICE OF THE
MERANGKONG SENSO TELONGJEM TULI
P.O. Tuli Town - 798618
Dist. Mokochung : Nagaland.

TENÜNGSANG AGÜTSÜR

Merangkong Senso Telongjem Tuli ajanga Wb. K. Tsuktitoba Ao aser Wt. Moarenla na jala **Kr. Lipoktila**, NSSB ajanga agiba exam nung takok Tulu nguteta, **LDA cum Computer Assistant, Public Health Engineering Department Directorate** nung ngutetba asoshi tenüngsang agütsür.

Merangkong Senso Telongjem Tuli ajanga nü sempet tajung nüburtem asoshi temoatsü südakjang da sarasadema atar.

IMKUMZUKBA President Merangkong Senso Telongjem Tuli
MOASASHI General Secretary Merangkong Senso Telongjem Tuli

Annexure - II

NOTICE INVITING TENDERS FOR LEASING OF OFFICE PREMISES

Indian Bank, a Public Sector Bank invites tenders under 2 bid system (Technical & Financial Bid) from owners of office premises willing to offer on lease basis (Readily built / Premises Under construction) in and around Dimapur Town, measuring in the range of 1500 sq.ft. to 1600 sq.ft. carpet area, in Ground Floor with parking facility for a lease period of 20 years for setting up their Branch / ATM. The tender forms can be obtained from the following address from 16.08.2023 to 25.08.2023 on payment of Rs. 250 (non refundable) by way of DD / BPO favouring INDIAN BANK. Last date for submission of bids 31.08.2023. The Bank reserves the right to reject any or all offers without assigning any reasons whatsoever.

AGM, ZO Dibrugarh
Indian Bank,
Chiring Chapari,
T R Phukan Road, Assam 786001
Details can be obtained from our Website : www.indianbank.in

Niger tir menden nungi atsüngdoker alisang anema ken o benoktsü

Niamey, Luroi/August 14 (Agencies):

Linük ashioksüba aser national security nung tetsükdaksü agütsüba mechi atsüngdoker aliba tir Mohamed Bazoum anema ken o benoktsü sentongtem Niger indang mitkar lenirtemi sangdongogo.

Bazoum nem tanaben yimsü südaktsütsü asoshi linük balalai ajungshiba mitkar lenirtemi agizüktsü memolungba temaitsü tasenbaji ibai alitsü.

Hopta asem shi tejakdang mitkar temi tashiyim amshia sorkar atsüngdokba sülen pa ya tir aliba ki basement nung yua lir.

Tang tashi Bazoum temang aser tekolok-shisatsü shidak aser junga lir, ta pa indang doctor-i pa ajuruba sülen ashi.

Bazoum chiokang ta linük balalai akhangba mapang Honibarnü doctor-i pa semdangtsü ya mela liasü.

Ajisüaka menden nungi atsüngdoker aliba tir aser pa den yariteper temi linük ashioksüba aser Niger indang internal aser external security nung timtem agütsüba anema ken o benoktsü kuli bendena lir, ta mitkar temi state TV nung sangdong ka agütsü.

Ajisüaka parnoki iba dak alaka osang tejangja magütsü.

Arishi küm 63 tain Bazoum ya pa kinungtsü aser jabaso den külemi pua lir aser pa temang asoshi nüburtemi khuret abener.

Presidential guards unit tekolakba Gen Abdourahmane Tchiani-i pa sasa July 26 nü pa Niger yimsüsür tasenba ta sangdonga liasü.

West African regional bloc,

ECOWAS ajanga mitkar tashi amshitsü amokmerena lir, saka tang tashi parnoki jembiba ama meinyaki lir.

Dangari teka amoshira ozü sasa nokdaksü ta mitkar lenirtemi sangdonga lir.

ECOWAS ajanga mitkar lenirtem nem tenokdangba balala agüja lir aser Niger dangi electricity yokba soita lir. Iba yongji linük yimtiba Niamey aser danga yimti tulutem nunga current junga mangur.

Honibarnü kidangr Nigeria linük nungi Muslim putir telok kati Niamey nung mitkar lenirtem ajurua iba mepetmesü tatem kati arutsü asoshi jembia liasü.

Onok nem tenokdangba balala agüja aliba agientsü asoshi ECOWAS den jembishinü akatsü teimla lir, ta mitkar temi shimba Ato Kilonser Ali Mahamane Lamine Zeine-i ashi.

Niger nung mitkar temi sorkari atsüngdokba ama anasa Burkina Faso aser Mali nunga ataloka lir aser kasa mapang Islamist telungpurtem tali jateter aser Sahel region nung sen yong raraba Wagner telok tem ajanga Russia sentsü tali akumer.

Tepuokdak liaka Bazoum-i The Washington Post nung article ka adoka pa tashiyim amshia pua yua lir aser mitkar temi tashiyim amshia sorkar atsüngdokba ajanga asen linük, asen region aser alima ajunga nung timtem alitsü, ta ashi.

Bazoum ya temang tuozük kanga ajemogo aser par jabaso arishi küm 20 tain ya chronic medical condition lir aser temang anepalu mesüdaktsür.

(Maneni tapak 8 nung...)

Wrestling World Championships atema trials Patiala nung agitsü

Luroi/August 14, 2023 (Agencies): Wrestling World Championships atema trails August 25 aser 26 nü Patiala nung agitsü, ta ad-hoc panel-i Hombarnü sangdong ka ajanga metetdaksüogo. Iba ajanga asayartem shimtsü asoshi tetoktepba dak sendakba nung ken o mejangjai aliba jangjashitsüogo.

Asian Games trials atema Bajrang Punia aser Vinesh Phogat na nem taitok agütsüba ajanga mepetmesü tulu adok aser ad-hoc panel-i iba telemtetba agiba ya wrestling fraternity timba kati aija liasü.

Ajisüaka World Championship trials atemabo ad-hoc panel-i asayar ka nem danga taitok magütsü. Iba asayamung ya Belgrade nung September 16 nungi 24 tashi asayatsü.

Worlds atema shimdanger aliba asayartem atema criteria shisema aliba nung ad-hoc panel-i ashiba agi, "medal ngur alirtem aser 2022 aser 2023 küm international/ ranking/ Asian/ World Championships/ Commonwealth Games aser 2022 Tokyo Olympic Games nung shilem agir alirtem ajak

World Championship atema shimtsü asoshi trails nung shilem agitsüla."

Ajisüaka Bajrang aser Vinesh na Worlds atema trails nung shilem agitsü magitsü tang tashi telemtetba agia mali, kechiyong parnoki September 23 nü nungi tenzüksü aliba Hangzhou Asian Games ya iba asayamung den kanga anasatepa lir ta bilemer.

World Championships ya 2024 Paris Olympics atema mezüngbuba qualifying asayamung asütsü.

Asayartem tenüng yoktsü atema tatemangbuba anogo August 16 nü lir, ajisüaka United World Wrestling (UWW)-i India-i mepeshiba ama anogo atsülangtsütsü agizükogo, kechiyong WFI elections dak sendakba nung ken o mejangjai lir.

Mezüngbo ad-hoc panel-i trails ya August 10 nü agitsü telemtetba agi aser August 3 masü dang state association tem dangi osang yoka liasü.

Ajisüaka mapang tatsüka lir panel-i WFI governing body tasenbai iba telemtetba ya agitsüla ta lemtet kechiyong


parnok August 12 nü tashi nungbo shimtsü aser iba ajanga lenirtem nem trail agitsü atema aser UWW dangi tenüngtem yoktsüba atema mapang peria agütsütsü.

Ajisüaka Punjab aser Haryana High Court-i election agitsü anogo ka lia WFI election magi atatsü tetuyuba agütsü aser election ya August 28-i belener ao. Iba ajanga wrestler tem World Championship nung asayatsü asoshi ken o mejangjai aküm ibayongji ad-hoc panel-i trails agitsü telemtetba agia liasü.

Selection Trials agiba anogo SAI Centre, NS NIS, Patiala nung 7 ako nungi tenzüka asayartem temang tozük asadangtsü aser weight category ajak nung seret ananabo taitok agütsütsü.

Trails ya item category tem atema agitsü: Freestyle: 57kg, 61kg, 65kg, 70kg, 74kg, 79kg, 86kg, 92kg, 97kg and 125kg. Greco-roman - 55kg, 60kg, 63kg, 67kg, 72kg, 77kg, 82kg, 87kg, 97kg and 130kg. Women's wrestling: 50kg, 53kg, 55Kgk, 57Kgk, 59Kgk, 62Kgk, 65Kgk, 68Kg, 72kg and & 76kg."

Shaheen Afridi ILT20 franchise Desert Vipers nung denogo



Shaheen Afridi

Luroi/August 14, 2023 (Agencies): Pakistan nung nungtugu left-arm pacer Shaheen Afridi, UAE indang ILT20 tanabuba season atema Desert Vipers den küm asem asoshi tenangzüktepba ka yangluogo.

Pa ya iba league nung asayaba Pakistan nunger mezüngbuba asayar asütsü, koba taruba küm January ita nungi tenzüka asayatsü.

"Ni Desert Vipers nungi asayatsü atema yongya atar. UAE nung Pakistan cricket fan

tem aika lir ta ni meteta lir aser parnoki taruba ILT20 nung onok team pusemstsü imlar atar," ta Afridi-i ashi.

ILT20 taruba season ya January 13 nü nungi tenzüksü aser Afridi ya Australia nungi meyipa aruba sülen team nung adentsü imlar.

Vipers puri taoba küm Pakistan nung asayar ishika alizüksü merandang saka takok monguteti liasü.

Taoba küm Vipers puri Azam Khan den tenangzüktepba ka yanglu. Pa

ya iba league nung asayaba Pakistan nunger mezüngbuba asayar kümer lila, ajisaka Pakistan Cricket Board (PCB)-i pa iba league nung asayatsü atema no-objection certificate magütsü.

Tang PCB mendenbuba Zaka Ashraf-ibo asayartem T20 league balala nung asayatsü atema temelaba agüja arudar.

"Shaheen ya alima nung asayar tajungtiba rongnung ka lir, shibai Pakistan team atema dang masü saka pa asayaba team tem atema kanga junga asayaogo," ta Vipers director of cricket Tom Moody-i ashi.

"Pa ya asaya nung temelenshi bener aruba pace bowler ka lir, shibai top-order batsmen tem aika nem timtem agüja arudar aser iba den pa lenir tajung ka lir anungji iba ajanga Desert Vipers nem teyari agütsütsü," ta Moody-isa ashi.

Team nung Afridi, bowler Wanindu Hasaranga, Matheesha Pathirana, Tom Curran aser Sheldon Cottrell nung den longjemtsü.

Niger tir menden nungi atsüngdoker...

Bazoum ya nisung memesük pua yua lir aser international human rights law nung aibelener, ta UN human rights chief Volker Turk-i ashi.

Mitkar temi tashiyim amshia Bazoum atsüngdokerba mapang par jala arishi küm 34 tain Zazia ya France nung liasü aser lai UK nung aliba Guardian

osangkaket dang taoba hopta ashiba agi, pa tebu, tetsü aser tenu nung nem tzü temerek mesüra electricity magütsür aser jang aser 'pasta' dang chia alir.

Power maliba ajanga fridge nung aliba chiyongtsü tajung raksar, ta lai ashi.

Bazoum ya tir menden nungi

(Tapak 7 nungi...) atsüngdokerba sülen khen dang ngudanga lir, aser ajia pai Chad lenir Mahamat Idriss Déby Itno ajuruba sülen noksa ka prokshiba lir.

Mitkar temi sorkar atsüngdokerba Déby-i mitkar lenir aser Bazoum ajurua mangatetet aliba bentettsü merang saka takok mangu.

Real Madrid-i Chelsea Goalkeeper Kepa Arrizabalaga loan nung anirogo

Luroi/August 14, 2023 (Agencies): Real Madrid aser Chelsea FC nati Kepa Arrizabalaga season ka atema loan nung yoktsü atema mulungtepego.

Madrid nung amendaker aliba club yagi Spain nunger goalkeeper ya club nungi 2024 küm June 30 tashi asayatsü, ta Hombarnü metetdaksüogo.

Kepa ya Thibaut Courtois melen anir aru shiba tang yirur lir.

Arishi küm 31 tain Courtois ya taoba Brehostibarnü training agiba mapang temekok tabelen yiruogo aser pa ita aika masayatetsü.

"Madrid nung season tepeyong junga asayatsü club-i imlaja atar, kong pa taoba Chelsea head coach Carlo Ancelotti den inyaksü," ta Chelsea-i sangdong ka ajanga metetdaksü.

Kepa Chelsea nungi season pongu asayaba mapang pai UEFA Champions League, FIFA Club World Cup, Europa League aser European Super Cup kokogo.

2022-2023 season nung pai Premier League nung best save

naroküm agizüka liasü.

Kepa ya Spain nunger international asayar ka lir aser pai 2023 Nations League aser 2012 küm Under-19 European Championship-a koker lir.

Arrizabalaga ya 2018 küm Athletic Bilbao nungi euro million 80 yong Chelsea nung arua aden, ajisüaka club nung pa jenjang mejungi kümogo aser Chelsea-i taküm Brighton & Hove Albion nungi goalkeeper Robert Sanchez alizükogo.

Pa Bayern Munich-ia alizüksü atema asadanga liasü, kechiyong parnoka Manuel Neuer yiruba ajanga goalkeeper ka nungdaka lir.

Kasa mapang nung Courtois-a 2018 küm Chelsea nungi Real nung arua aden. Chelsea nungi asayaba mapang pai Premier League ana, FA Cup aser League Cup koka liasü.

2022 Champions League final nung pai kanga junga asayaba sülen pa nem Player-of-the-Match naroküm agütsü. Iba asaya nung pai goal aitsü aliba ball tekuben tashi kümzüka par team-i goal 1-0 agi Liverpool madak takok ngua European title 14buba aben.

ATP-WTA Rankings: Sinner 6bubai tuogo; Liudmila jenjang 6 tejakdangi atu

Luroi/August 14, 2023 (Agencies): Italy nunger Jannik Sinner pa indang career nung tang mezüngbuba jenjang trokbubai tuogo. Toronto nung mezüngbuba Masters trophy akokba sülen Hombarnü sayaba ATP ranking nung pa trokbuba nung lir.

Arishi küm 21 tain Sinner-i, Toronto asayamung final nung 6-4, 6-1 agi Australia nunger Alex de Minaur koka liasü, shiba jenjang trok tejakdangi tua tang 12buba nung lir.

Wimbledon aser US Open koker alisang Spain nung Carlos Alcaraz maneni temaba jenjang nung lir aser pa sülen Novak Djokovic aser Daniil Medvedev na tanabuba aser tasembuba jenjang nung lir.

Denmark nung asayar Holger Rune pongububai tuogo aser Norway nung asayar Casper Ruud jenjang ana asepzüka lua tang tenetbuba nung lir.

Kasa mapang nung WTA rankings nung Liudmila Samsonova-i Montreal Open nung final tonga asayaba sülen la jenjang trok tejakdangi tuogo.

Final asaya nung lai Jessica Pegula makok saka la jenjang

12buba tongtetogo.

Tetsürtem rongnung Iga Swiatek temaba jenjang nung lir aser la sülen Aryna Sabalenka aser Pegula na tanabuba aser tasembuba jenjang nung lir.

ATP RANKINGS:

1. Carlos Alcaraz (ESP) 9395 pts
2. Novak Djokovic (SRB) 8795
3. Daniil Medvedev (RUS) 6530
4. Stefanos Tsitsipas (GRE) 5090
5. Holger Rune (DEN) 4790 (+1)
6. Jannik Sinner (ITA) 4725 (+2)
7. Casper Ruud (NOR) 4715 (-2)
8. Andrey Rublev (RUS) 4595 (-1)
9. Taylor Fritz (USA) 3605
10. Frances Tiafoe (USA) 3050

WTA RANKINGS

1. Iga Swiatek (POL) 9730 pts
2. Aryna Sabalenka (BLR) 8746
3. Jessica Pegula (USA) 6030
4. Elena Rybakina (KAZ) 5755
5. Ons Jabeur (TUN) 4746
6. Caroline Garcia (FRA) 4685
7. Cori Gauff (USA) 3760
8. Maria Sakkari (GRE) 3510
9. Petra Kvitová (CZE) 3445
10. Marketa Vondrousova (CZE) 3211.

BILEMDANGANG

"Khenyongi dangbo ajak mongutettsü; atasa inyakang."